

Dépozas insomnías,  
Forzá, forzáde grillós;  
Pode opérrir o ferro,  
Un corpo enfraquecido;  
Mais as nobres idéas,  
E gloriosos instintos...  
Recen... non pode, non o  
(duro ferro,  
Nin a morte, extinguído!  
Eduardo PONDAL

# A Nosa Terra

PERIODICO GALEGO

¡Bárbaros!

Las ideas no se mueren!

DOMINGO F.  
SARMIENTO

no XXVIII



BOS AIRES, DECEMBRO DE 1944



Redacción - Administración: Rúa BELGRANO 2186



Núm. 433

## Creación do Consello de Galiza

### ACTA DE FUNDACION

**A**LFONSO Rodríguez Castelao, Elpidio Villaverde Rey, Ramón Suárez Picallo e Antón Alonso Ríos, son os únicos deputados galegos que viven refuxiados en Sud-América, e, por espontánea decisión de todos eles, acordan xuntarse nun soio corpo de dirección política para gardar, manter e defender a derradeira vontade de Galiza, antramentras dure esta etapa de asoballamento, na que o povo se ve privado de toda eispresión democrática. Os ditos mandatarios afirman que a vontade política de Galiza arrinca legalmente do Estatuto plebiscitado en 1936. Pero no Estatuto hai que distinguir dúas cousas: o documento en sí, forzosamente limitado as eixencias da Constitución, e o desexo do goberno propio e vida libre que o acto plebiscitario supón. De ambas cousas — letra l espírito do Estatuto — son gardadores os deputados galegos, como fideicomisarios da vontade legalizada do seu povo. Agora ben; a latencia autonomista de Galiza manifestouse sempre a favor dos sistema federal, tanto nos acordos populares do ano 1873 como nos varios anteproxectos de Estatuto galego, acordados no período preconstituente da segunda República. Abonda citar o da Federación Republicana Galega que di así: "Artículo 1º Galicia es un Estado autónomo dentro de la República Federal Española". Este é o pensamento libremente eispresado polo republicanismo galego, que foi mandato para os seus deputados nas Cortes Constituintes do 31. E daí trascenden os principios dereitivos que se deben proclamar e defender, en nome de Galiza, ante as diversas intencións constituintes da futura Hespaña.

Os devanditos mandatarios defenderán, por conseguinte, o dereito de autodeterminación para o povo que representan; pero considéranse autorizados a restrinxir este dereito ao que é racionalmente xusto e posíbel, descartando, de antemán, o separatismo, e abogando por unha unión pacionada de todos os povos diferentes de Hespaña, ou millor da Península, dentro dun Estado plurinacional republicano, con garantías de liberdade para os homes e os povos. Tendo en conta que a vontade dos eleitores galegos representa unha infima minoría de votos no corpo político de Hespaña e que, polo tanto, a vontade do povo galego sería indefectiblemente vencida polo peso numérico dos votos non galegos, resulta natural que os representantes de Galiza busquen o equilibrio democrático de Hespaña a base dunha nova estrutura do Estado hespañol, na que os povos sexan os verdadeiros suxeitos do dereito político. Para este fin, a unidade

de dirección política de Galiza no exilio, emprenderá unha campaña, xunto co Goberno de Euzkadí e o Consello Nacional de Cataluña, para pesar, por convencimento, na conciencia liberal e democrática dos demais hespañoles.

En virtude das declaracións anteditas, acordouse constituir unha entidade denominada CONSELLO DE GALIZA, para gardar, manter e defender a vontade do povo galego, así como para buscar as asistencias e axudas que se precisen. O Consello empezará a funcionar como un Fideicomisariado, baixo a responsabilidade dos catro persoeiros que suscriben este documento, asistidos por un estenso núcleo de emigraos galegos, neste lugar de América que pode considerarse como a metrópoli ideal dunha Galiza libre.

O Consello conta ao nacer con varias Delegacións en América e con órgaos técnicos e auxiliares que aseguran a súa eficacia. E como primeira medida acordou, por unanimidade das Conselleiros e unánime consenso dos grupos organizados, conferir a Presidencia do Consello de Galiza a Alfonso Rodríguez Castelao, quen fica autorizado dende este intre para levar as negociacións de alianza cos Presidentes de Euzkadí e Cataluña, a fin de que Galiza entre, con propia persoalidade e triple forza, nunha concordia xeral hespañola, capaz de derrubar o réxime franquista e restablecer a liberdade en Hespaña.

O Consello de Galiza non nace pechado e circunscrito aos catro deputados que residen en Sud-América, porque éstos non descoñecen a existencia de outros compañeiros de Diputación, eixilados en diversos puntos do mundo, quénes poden integrar o Consello de Galiza, si queren manter e defender as aspiracións do seu povo, do que recibiron un mandato persoal. O fin e ouxeto do Consello de Galiza, implica un respecto absoluto para calisquera ideoloxía de tipo democrático; pero tendo en conta que o povo elixeu a persoas e non a partidos, é xusto que nos Conselleiros prime a condición de galegos sobre da disciplina de partidos non galegos a que poidan estar afiliados, porque de non ser así negaríase a vontade de goberno propio, hipotecando as súas decisións a directrices estranas. Así, pois, os Conselleiros de Galiza serán simples mandatarios de povo que os elixeu e non dos partidos.

Fírmase esta acta en Montevideo, no día quince de novembro de mil novecentos coarenta e catro. — Alfonso R. Castelao, Elpidio Villaverde, Ramón Suárez Picallo, Antón Alonso Ríos.—Rubricados.